

Majlis Pelancaran Pesta Buku 2011 dan Jubli Emas

Ucapan Menteri Kebudayaan, Belia dan Sukan, Yang Berhormat Pehin Orang Kaya Pekerma Laila Diraja Dato Paduka Awang Haji Hazair bin Haji Abdullah di Majlis Pelancaran Pesta Buku 2011 Sempena Perayaan Ulang Tahun Hari Kebangsaan Negara Brunei Darussalam ke-27 dan Sempena Jubli Emas Dewan Bahasa dan Pustaka Negara Brunei Darussalam (1961-2011) di Pusat Persidangan Antarabangsa, Berakas pada Hari Sabtu, 26 Februari 2011.

Bismillahir Rahmanir Rahim

Assalamualaikum Warahmatullahi Wabarakatuh

ALHAMDULILLAH, segala puji bagi Allah Subhanahu Wata'ala atas limpah dan izin-Nya jua maka kita dapat berhimpun di Majlis Perasmian Pesta Buku Brunei Sempena Sambutan Ulang Tahun Hari Kebangsaan Negara Brunei Darussalam Ke-27, tahun 2011 dan Sempena Sambutan Ulang Tahun Jubli Emas Penubuhan Dewan Bahasa dan Pustaka (DBP) Negara Brunei Darussalam (1961-2011).

Buku yang sinonim dengan pembacaan adalah sangat berperanan penting di dalam kehidupan seseorang individu, pembangunan tamadun bangsa dan kecemerlangan pembangunan sesebuah negara sehingga terdapat ungkapan yang mengatakan 'rakan atau teman baik seseorang adalah buku' (a man's best friend are books). Di negara-negara yang maju seperti di Eropah, Amerika, Jepun dan Korea, penerbitan dan penjualan buku adalah merupakan industri dan perniagaan yang besar. Negara-negara maju menerbitkan buku-buku baru dan menterjemahkan buku ke dalam bahasa mereka dalam bilangan ribuan malahan puluhan ribu judul atau tajuk dalam setahun. Begitu juga rakyat di negara-negara maju membelanjakan sebahagian besar gaji mereka kepada pembelian buku- buku dan mereka menjadikan membaca buku adalah sebahagian daripada budaya kehidupan seharian mereka.

Adalah amat jelas buku dapat memperkaya dan memperluaskan gedung ilmu pengetahuan dan memperkembangkan ketajaman minda dan intelek seorang individu masyarakat dan sesuatu bangsa. Bangsa yang mengangkat martabat bangsa dan mencapai pembangunan yang cemerlang di bidang perekonomian, perindustrian, teknologi, pendidikan, politik dan sosial.

Dalam konteks Negara Brunei Darussalam yang mengamalkan konsep Melayu Islam Beraja (MIB), rakyat dan penduduk terutama generasi muda dan belia sewajarnya menjadikan penerbitan dan menterjemah buku dipergiat dan diperbanyakkan. Manakala budaya membaca

buku dijadikan sebagai sebahagian daripada budaya kehidupan bernegara. Ini memandangkan di dalam Al-Qur'an sendiri menekankan akan pentingnya ilmu pengetahuan bagi pembangunan ummah dalam mana ayat pertama yang diwahyukan Allah Subhanahu Wata'ala ialah Iqra yakni baca begitu juga Allah telah berfirman yang antara lain maksudnya:

"Tidak mustahil bagi manusia (umat Islam khususnya) untuk menerokai apa yang ada di angkasa lepas dan yang terkandung di dalam perut bumi dan ini dapat dilakukan hanya dengan ilmu." Sehubungan dengan itu, ilmu yang dimaksudkan itu termuat dan tersirat di dalam buku- buku ilmiah dan intelektual yang dihasilkan oleh cendekiawan manusia sendiri yang hanya dapat digali dan memanfaatkan melalui pembacaan.

Tema Hari Kebangsaan 'Negaraku Brunei Darussalam' dan tema Pesta Buku Brunei, 'Buku Adalah Masa Depan' mempunyai hubungan rapat dan memberi pengertian yang sangat luas maknanya kepada semua lapisan masyarakat di negara ini dalam menjana masyarakat berilmu kerana buku adalah satu medium untuk menggali berbagai-bagai disiplin ilmu baik dalam bidang politik agama ekonomi teknologi budaya dan ICT yang boleh mendewasakan kita untuk berfikir untuk bekerja untuk berkreasi terutama dalam membentuk sahsiah masyarakat madani yang lebih inovatif dan kreatif.

Senario penerbitan di negara ini belum lagi mencapai tahap yang cemerlang yang setanding dengan terbitan luar negeri dalam melahirkan gagasan dan lontaran fikir yang jauh ke hadapan. Kita masih kekurangan bukubuku biografi dan autobiografi yang mengemukakan tentang pencapaian individu yang dapat dijadikan inspirasi belielabelia di negara ini.

Kendati, adalah tidak mustahil dan menjadi sesuatu yang musykil untuk dilaksanakan dan dicapai di negara kita dewasa ini. Dengan adanya institusi- institusi pengajian tinggi di Negara Brunei Darussalam seperti Universiti Brunei Darussalam (UBD), Universiti Islam Sultan Sharif Ali (UNISSA), Kolej Universiti Perguruan Ugama Seri Begawan (KUPU SB) dan Institut Teknologi Brunei (ITB) telah banyak dan mampu menghasilkan buku- buku dan bahan kajian bagi tujuan pengajian akademik yang sebilangan besarnya mempunyai nilai- nilai intelek dan ilmiah yang boleh diterbitkan sebagai buku untuk dijadikan bahan bacaan umum bagi pembangunan minda dan intelek.

Begitu juga, melalui menerbitkan buku-buku penting misalnya dalam bentuk pictorial, buku- buku yang disajikan untuk pengetahuan dan seterusnya buku-buku bahasa asing yang diterjemah ke dalam bahasa Melayu, insya-Allah akan dapat memberikan warna kepada perkembangan penerbitan di negara ini.

Apa yang diharapkan ialah DBP, yang sudah mencapai umur kedewasaan 50 tahun dan penerbit- penerbit swasta di negara ini perlu mengorak langkah untuk lebih profesional dan melangkah maju ke hadapan untuk sentiasa berusaha menerbitkan bahan-bahan kajian yang

dihasilkan oleh institusi- institusi pengajian tinggi di negara ini sebagai buku bacaan dan mencari mekanisme untuk menerbitkan buku-buku berkualiti yang boleh menjadi sumber rujukan kepada anak bangsa peneraju masa depan. Penerbitan buku-buku yang berkualiti dianggap sebagai satu simbolik yang boleh menyambung apa yang dianggap sebagai perjuangan dan juga sebagai pengorbanan kita kepada negara.

Dengan kemasukan Negara Brunei Darussalam sebagai ahli ASEAN Book Publishers Association (ABPA) pada tahun 2006 dan Asia Pacific Publishers Association (APPA) pada tahun 2007 akan membuka lagi ruang dan peluang kepada negara ini menghasilkan buku- buku yang berkualiti tinggi. Kerjasama antara negara-negara ahli akan meningkatkan kolaborasi dan pembangunan industri penerbitan di rantau Asia-Pasifik yang akan memudahkan untuk menerbitkan buku-buku hasil tempatan dan mengantarabangsakan penerbitan buku negara ini.

Akhirnya, saya mengucapkan setinggi-tinggi tahniah kepada pegawai dan kakitangan DBP, jabatan- jabatan kerajaan, pihak-pihak swasta dan media yang mencurahkan tenaga berusaha menjayakan Pesta Buku Brunei 2011. Maka dengan melafazkan kalimah Bismillahir Rahmanir Rahim dan bertawakal ke hadrat Allah Subhanahu Wata'ala saya dengan amat sukacitanya merasmikan Pesta Buku Brunei 2011 Sempena Sambutan Ulang Tahun Hari Kebangsaan Negara Brunei Darussalam Tahun 2011 dan Sempena Sambutan Jubli Emas Penubuhan DBP Brunei Darussalam (1961-2011).